




厚岡文集卷十三

述

萬載李榮陞奠基甫

羽堯盧
石生辛樹
佐臣湯立賢



三忠祠述

三忠祠在會城東南隅迎恩亭西二百步街道北南向東南去石
虎岡二忠祠舊基五里西去地藏寺墓祠一里府志併地藏於石
虎為一地非也初明太祖既有天下元君走漠北其宗室柏 匝
刺瓦兒密猶據雲南稱梁王洪武五年命翰林待制金華王公禕
往招之王猶豫未決然雅敬公命其員外郎賈寬改館而羈縻不

遣久之漠北使至責雲南不應匿南使公遂見執遇害瘞于地藏寺北奉使之次年也至八年復命湖廣行省叅知政事毘陵吳公雲往是時獲雲南遣北之使鉄知院等械至京上釋之命與公偕行至雲南沙糖口知院欲公易服辮髮詐爲元使以給梁王公執不可亦遇害殞于給孤寺其後雲南平事在二十九年二月王公之子紳來求葬處已墟平就立表識焉吳公之子黻白其事於朝許馳驛奉柩歸葬於湖廣江夏之金口鎮正統間王公得贈翰林學士奉議大夫諡忠文立祠於石虎岡歲時致祭卯治辛亥巡撫常山王公某爲吳公請亦得贈資政大夫刑部尚書諡忠節秩祭如前蓋自正統時立祠稱忠文凡數十年改額爲二忠又十四年爲卯治甲子副使清江彭綱始爲之記云紳之表瘞紳有滇南勸哭祀惟言設主於地藏寺東夾室

不及表也程立本謫於滇爲記其事而刻之嘉靖十八年副使朱瘞事良矩更於瘞所封土題其碣曰皇明詔使王忠文先生墓墓南築祠一區置守卒耕其旁地以自給副使甌寧李默爲之記蓋當明之盛二公既有合祠而王公以遺殖所在又立專祠云明旣本朝康熙十二年西平王吳三桂構逆雲貴總督遼東甘公文岷趨鎮遠圖扼險以拒守不克而死其後大兵平雲南各祠已燬於兵三十一年總督范公承勳巡撫石公琳就東關內爲新祠祀王吳及甘公題爲三忠祠蓋以甘公之節得與王吳相並也而甘公故有專祠在貴陽五十五年甘公國璧來撫滇忠果公之六子也旣新黔祠屬總督蔣公陳錫爲之記又葺三忠祠而去雍正八年復因事至滇查祠租之入付姪孫某經理之自爲記香火賴以不

陸至於今蓋嘗反覆諸公之論彭副使謂王公被畱既久死後又得能文者張之故邀贈諡祠祭爲早而吳公之墓雲南人罕知轍又沒於交趾令不克陳乞二公死事同而恤典異非常山王公爲之請則其節不著其寄慨於吳公深矣李副使又謂當高帝在御吳得邀恩錄其子而一時賢王守臣不能言待制死節事革除初紳始自言之贈翰林學士諡文節國統旣易事遂不顯垂四十餘年有司猶不敢舉舊諡以爲時諱稍因正統詔書言狀得再邀諡贈二公身後所遭有幸不幸如此因謂公以剛直取謗執事之臣忌而遷之以窮死比吳公尤若可痛者何哉夫二公先後犯死百折而不同豈值不辱其命耶一夫蹈義萬衆同仇所以蹙梁王之脈者其機在此然二公非有所冀於身後也夫君臣之爲國一體

相侵手足糜而腹心滋痛自然之理也苟教忠之典遲而不卽舉舉而不能周天下枵然不滿其望不得已於其人身後極無聊中彼此校量卒亦無所歸其咎於是引以爲天怨爲勢家怨爲膠吻齟舌不能發明忠憤之具臣怨至于君心愆然視死事若罔聞知則不敢以爲說者引避之辭宜然然而其實詎可掩耶方忠果公以殉節發聞於鎮遠我

聖祖皇帝已悼之甚其後賜祭賜諡立棹楔樹豐碑所以致褒於公者一則曰舍生取義再則曰爲國捐軀終曰永爲臣子之型其垂

眷至于如此然則何憤不攜何幽不顯逆賊旣走死無地天下自此永平矣嗟乎爲彼二忠者滅沒垂百年請恩猶多齟齬爲此一

忠者不崇朝

天章屢賁而令子復得開府于茲後之過斯祠者跡其食報之遲速厚薄有不敬仰我

朝君臣相遇之隆絕出於前古者乎元人將伐大理再遣使招之聞其遇害而後兵進其伐宋也亦以羈畱行人爲辭其恤典有無無由考大要與明祖遣使極相類程本立記待制亦引其事發端卒謂其出於元人不足道夫豈上下古今之公論哉此祠之左有蔡公毓榮祠以綏遠將軍爲制府平逆有功府志失載祠之後故有漪香亭康熙三十六年王制府撫循之餘與石撫軍疏沼築臺後人改二賢祠奉之王之門生琅鹽井提舉姚龜爲記今並蕪廢祠之右有報功祠祀賽咸陽沐黔寧故皆有專祠兵燬康熙三十

年范制府合祀於此自爲記今惟存大門王主積左廡下兩公主分祠三忠之旁香火弗及焉憶去歲嘗過地藏拜待制墓尋明代碑碣無有府志云康熙三十年知府張毓碧就寺起封謂之雙忠墓蓋未考前記以吳亦畱骨也王墓在寺北張封之寺東南皆非是附及之丁未腊月十六迎西道信步覽此歸而次第爲記

海源寺述

西華洞

正覺寺

海源寺在會城西十五里黑林堡一日班莊村村依聚仙山東其
 山北南連亘十餘里西通玉案山多聚立之石故以名山趾出大
 泉東南流入於滇海人率以海源名之水北有龍王廟水南即寺
 門外平田泱泱其中殿三進為彌勒三寶五如來夾以樓屋穿右
 戶出繞行殿後林嶂高橫仰不見日左壁下有元平章脫歡所造
 毘盧閣供千手目菩薩身長丈二內百手稍粗各有所擎向外漸
 小而密相厠成規如火燄頭上亦安三面頭四層下巨上纖屬於
 手閣之頂叠井相函覆以鏡重簷上金塗大字曰大悲之閣傍小
 字不可辨僧倚梯後山合承之躋行筒瓦間寫之右行具官階云
 德主蜀國公銀青榮祿大夫雲南諸路行中書功
 省為須平章政事知樞密院事脫歡普化書
 左行志年月云大元至

正三十一年十一月初八日創建空處後人附刻二條按元至正二十八年戊申順帝北遁明祖立元洪武至辛亥天下久合一雲南猶奉元朔故有至正三十一年之紀也其時順帝已殂世子改元宣光雲南猶未知耳脫歡史志弗詳惟見憫忠寺支渭興碑云榮祿公由本省郎中歷陞首相寬裕民力公私有餘城內外佛宇神祠皆易新之得昔賢先成民而後致力於神之意考其時強敵已歷境乃輕用財力如此豈非溺佛之深倖神威可藉耶然未幾征南師至民率委而去之寺右廊有碑宣德八年癸丑叅政閩陳遜記二沐重修事已仆地驗之閣刻蓋三年修寺七年修閣至是乃立石也總兵官征南大將軍大傅黔國晟其後封定遠王諡忠敬都督昂其後贈定邊伯諡武襄並黔寧王之子著績於滇永洪宣正之際碑祠

廟者多述之入本朝康熙十五年僧妙菴即閣刻偽周四十二年督標官夏騰龍遞新此閣夏有碑於規模無改故滇人傳其製為最古云閣左數丈有石突出其端構亭奉大士無碑近人所贅也海源廟別有考

西華洞府志地理云在聚仙山石孔嵌結若芙蓉予憑海源雛僧為導自龍王廟始山繞至寺墻後乃北轉千步屈洞口東南向城村山海豁然在望其中大如廳事左壁及前垣之半流形裝積錯采若繪畫范制軍刻曰五色芝房王制軍刻曰聳翠流丹皆懸垣端其外題刻尚衆後壁石礪砢沓起范有絕句目為瓊臺以媿天上十二樓並許臬使和章鏡壁臺端有盆水滌深如鏡其頂懸石形色正如佛手柑東北二小洞無奇臺南池處刻字多泐此洞明

未發聞 本朝康熙平逆後各宦踵至拊循凋敝屢其職而遊觀不廢洞之勝益顯然去會城稍遠佚遊者畏之且佳境易盡徐霞客取以並平彝之清溪過矣

正覺寺在海源寺南半里亦負堡山而東向寺隱林際外視以爲小入其中乃弭敵過於海源殿亦三進後殿右壁有明成化十九年碑記此寺元僧定山所創明初燬繼修者爲永樂戊戌居士李文秀成化丙申僧芳詮中左廊有崇正年續修碑傅忠壯公記其里人也是日由海源來過日已暝不及讀檐下梅身溢抱骨朽而皮存僧云數代所見恒如此視黑龍潭之本殆過之丁未腊月七日

者樂土司述

一世阿哀元至正間授蒙統蒙魯軍民長官司

二世哀羅

三世木板明洪武拾肆年大軍平雲南其地爲麓川平緬宜慰司思倫法侵佔抄燒司治木板逃至馬龍他郎甸長官司江頭鄉充該司火頭助守叁拾壹年委官萬指揮等來各處分疆界設衙門木板赴總兵官西平侯沐處繳驗前元誥印三十二年七月給直隸者樂甸長官司印除授長官司賜姓刀明年十一月故

明史景東傳云洪武十八年百夷思倫發叛率衆攻景東之北吉寨土官俄陶避於大理白崖川麓川傳云二十一年倫發寇馬龍他郎甸之摩沙勒寨西平侯沐英遣都督甯正擊破之供

所稱助守應在此時又云倫發悉衆三十萬象百餘寇定邊英
選師三萬更番射象奔賊大敗二十二年倫發乞貸死景東傳
云沐英討平思倫發復景東地俄陶仍舊職按木板之得回者
樂亦應同時而供脫落爾

四世刀遲卜

五世刀談永樂十八年赴京十一月除前職明年五月任事正統
二年十月總兵官都督同知沐昂調剿馬龍他郎甸賊首刀葵等
解官五年正月麓川賊首亦保八甲等殺擄景東地方村民調剿
並有功天順六年七月故

新化傳云宣德八年黔國公沐晟奏磨沙勒寨萬夫長刀葵及
弟刀眷糾兵侵占馬龍他郎長官司衙門請遣昂討之正統二

年又請調附近官兵合昂剿捕命仍撫諭事遂不竟

六世刀猛

七世刀明濟告襲間故

八世刀華應襲結勘會奏成化十一年奉布政司劄付准兵部深
字八百五十七號勘合照例納穀二百八十石赴景東府景豐倉
上完會委雲南右衛指揮張珊景東土知府陶洪伴送回司於本
年十月到任正德八年七月病故

明史土司總序云洪武初土官襲替必奉朝命萬里外皆赴闕
受職天順末許土官繳呈勘奏則威柄漸弛成化中令納粟備
賑則規取日陋以刀談刀華事觀之史之言信而有徵矣

九世刀車正德九年六月任事車娶刀氏那氏刀氏生刀永刀景

刀昆永昆早世那氏生刀圭刀景保襲間因尋甸安銓等叛旗牌
官居鐘到司調景前赴楊林嵩明等處策應有功照土舍木公等
首功事例給與冠帶聽襲嘉靖十九年故

銓叛在嘉靖六年明年伏誅事具武定及尋甸土司傳其時調
鎮沅兵千人士知府刀寧息領之具鎮沅傳刀景事史失載

十世刀圭於 年襲職嘉靖七年三月任故

刀車卒年脫漏七年恐或是二十七年

十一世刀俸係刀景之子應襲三十年調征元江地方有功給冠
帶三十六年故

土舍那鑑戕土府那憲調兵勦之至三十二年鑑伏藥死見元
江土司傳又鎮沅傳云刀仁率兵征那鑑克魚復寨得那氏前

所傳鎮沅印以獻命給之刀俸事史亦未載

十一世刀儼應襲 年奉司劄付冠帶護印四十三年正月

初三日惡舍刀仲刀儀殺儼元江署印指揮楊秉擒獲惡逆解省
問擬極刑監故儼無嗣刀安年幼刀圭嫡子刀果應襲

儼應是景之次子俸之弟與刀仲刀儀行輩相同安應是俸之
子

十一世刀果於 年三堂集舍目等到官查審無異會議令

同祖母方氏護印委景東土知府陶金衛百戶朱綱護送回司視
事

景東傳云嘉靖中者樂甸稱亂劫景東府印去土舍陶金追斬
其頭目奪印歸金蓋以功陞知府也

者樂土司述

隆慶二年奉布政司劄付照霑益州土舍安素儀等納穀折銀襲替事例各衙門查勘明白取據親供宗圖冊結轉報五年二月司委景東衛指揮袁欽寵來取象果備價買進牙象壹隻萬歷二年九月司復委雲南右衛指揮顧守義黃如金來取象果又買進牙象一隻象奴一名並解訖十七年正月故

十二世刀安於十七年五月以承襲安邊事申詳三堂保勘會奏至十九年六月奉司劄付蒙撫按案驗准都察院七千二百六十二號勘劄准兵部咨本部題准刀安就彼襲職奉本部深字一百二十二號勘合准襲祖職卽於是月到任視事安在任民夷安靜以捐餉報効擒賊有功得加四級服色後因年老負疾卸事

十三世刀晟替職之際儘川貴變亂地方多驚晟勉力捐解糧餉軍器大銃續襖等項赴省報効天啟二年五月巡撫沈徑給劄付冠帶崇禎二年委臨安指揮趙一麟來取象晟買獲牙象一隻解省四年五月調勦阿迷州普名聲屢顯戰功撫按總鎮監軍會題叙功陞宣撫司兼遊擊府勘合在任晟娶景東土府陶明卿女生刀宗喬

十四世刀宗喬 光元年二月申詳院司承襲

供云崇禎十一年父安病故攷其年得八十餘 光元年晟卸事供亦云年老以碑考之其時僅四十三歲

本朝順治十六年大兵平滇永歷西走兵潰宗喬截殺潰兵被擄偽營其父晟遣人隨臨元差官楊土毅於八月內投誠十七年正月宗喬獲回司卽差舍目刀曇賚繳宣撫司印信於平西王吳康

熙二年正月奉給兵部武字八十四號號紙准襲其年十一月故十五世刀佩玉於康熙六年八月奉司轉給禮部頒發者樂甸正長官司康字三百十八號印信一顆祇領任事後因吳藩構逆換印康熙十七年四月佩玉病故

十五世刀佩璋乃佩玉之親弟佩玉既故無嗣舍目把刀曇沈惟正等公舉頂襲康熙二十年

大師恢復滇省三月內佩璋差親目刀畧王應賀前赴雲南提督桑軍前投繳偽印權頒劄付任事九月內奉定遠平寇大將軍固山貝子合劄到任二十一年十二月奉布政使司田轉發康字三千八百一十五號印信二十五年四月奉

兵部武選清吏司頒雲字九號號紙五十七年十月病故佩璋次

室刀氏生聯斗

十六世刀聯斗年三十六歲例應承襲

刀氏據者樂自元以來四百餘年歷十九世明史及通志頗言之予來縣詢遺事於後裔諸生雲沈云悉泯沒矣季世刀聯斗親供一冊僅存予取以驗之龍馬卽馬龍刻本偶誤傳云永樂初者樂始設長官司予按太祖本紀云洪武二十二年思倫發謝罪麓川平二十四年分其地置五長官司者樂居其一事見地理志及沐黔國碑至三十年麓川平緬土酋刀幹孟叛三十一年沐春擊敗之此供謂給司印在三十二年則建文之元年也傳又云永樂十八年長官刀談來朝貢馬供則爲談因父故來京請襲非長官朝貢之比隆慶以後頻進象又以功加四品陞宣撫司史一切畧之

供及譜俱稱俸後儼襲儼後果襲果後安襲省府志乃以果承俸以安承儼其繫並誤自刀談後景俸安晟四世比有戰功而晟尤喜事營祠廟刻碑以自張餘人非供莫傳故以暇日刑訂之爲土司述以裨傳志之闕遺刀氏旣拔誠

本朝襲職數世最後聯斗於雍正四年繳印請改設流官於是者樂遂爲縣授聯斗九品冠帶終其身考其族之始終非有悖逆淫穢如他土司之不德致勤師徒須鞠治者先時者民尚在亦未言有如他司之暴戾斷削致民夷不堪者四方旣蕩平蕞爾不能獨立見幾而作如聯斗者猶亡國之善嗣矣今歲冬安南內訌奉上臺檄調恩樂民夫二百餘名赴邊關運餉本非大舉然縣令按糧派費已形拮据甲夫或逃或怯予值二十兩尚惘惘有可憐之色

想當日刀氏奉調卽帶兵裹糧赴急不以告勞其儲峙訓練悅使有方不可誣也景東司傳云每調兵二千必自効千餘餉未嘗仰給公家者樂應同其俗刀晟一祠未容蕪沒或可以作承平頑慢之氣爾戊申臘月十九

陞宣撫司碑跋

右崇禎五年九月者樂長官司刀晟以功陞宣撫司碑在恩樂城西景來河西岸水閣中雲南師旅志云阿迷州土酋普名聲反巡撫王伉統滇黔蜀土司吾必奎等屯兵臨安以右布政使周士昌監軍擊名聲敗之進圍阿迷此碑所云崇禎四年阿迷蠢動奉令徂征大會臨安衝鋒開路火攻血戰解圍救衆列營虎穴騰驤阿迷自夏徂冬身經百陣卽其事也在四年秋冬有明文晟尋感疾告假西歸明史臨安傳云名聲旣被圍使人約降陰以賄求援於吾必奎兵始合必奎佯敗走官軍望見遂大潰布政使周士昌戰死朝廷以起釁罪伉逮治碑所云續而上臺械問衆心瓦解交兵助逆王師陷營卽其事也當在五年春夏志總序於四年傳總序

於五年皆失分曉是時主官從征著名者元謀吾必奎寧州祿永命石屏龍在田無有言刀戡者通志雖云戡加宣撫然史傳不載考職官志長官司正六品安撫司從五品宣撫司從四品西南諸蠻爲宣撫司者十爲安撫司者十九皆有定數且萬歷十二年孟密之陞宣撫蠻莫耿馬之添設安撫

賜四品服麓川傳

猶具載之阿迷功旣不卒巡撫猶逮治况一微末土司何由超陞宣撫其事固無稽矣雖然者樂西鄰鎮沅北接景東皆爲土知府同時奉調隨征戡之虛實宜無不知且土司承襲土府例應據供加結今讀其供云

本朝順治十七年刀宗喬投繳宣撫司印信於平西王其蹟顯白如此又不能以無疑間嘗旁考之武定傳云嘉靖七年土舍鳳朝

文亂黔國公沐勛言臣謹以便宜榜示所調集各土舍先給冠帶後奏請以作其敵愾之氣又雲南傳云沐氏恩威著於蠻徼每下片楮諸部具威儀出郭盟而後啟曰此今旨也土司進止予奪皆咨稟其時襲黔國者爲沐天波此碑徑以主上冠沐字夷習畏威如此想戡自臨安至阿迷衝鋒叙功第一六品積陞以至從四天波或以便宜假之而未經奏請故史無由得知志則以親供及之耳合戡本無軍功詭稱授職豈敢立碑道側以自張其僭妄之罪况兩土府出入所在亦豈得不畏其摘發耶又按通志云名聲雖戰勝仍巧詞乞撫當道懲前事不復致討總督朱燮元至自黔以兵威撫定焉此碑末云或時事太平英雄無用武之地又云遙聞金鼓鏗鉤淚洒征夫之雨嗟夫中原雖多故邊地人才可用乃

因勦逆失機遠逮主帥直指罪其起釁以撫終局明政不綱雖微
末土司深爲扼腕不但抱烈士暮年之悲而已其後首妻萬氏盡
其後夫敗亂雲南流賊乘之屠戮東南幾徧誰尸其咎哉戊申十
二月二十

鳳州府君述

明八世祖鳳州府君諱果蕃生值正德嘉靖間萬歷初巨盜李大
鑿阻守新昌之黃岡披各州縣深山爲五峒以擾民巡撫潘公季
馴督五營兵遮賊各募鄉勇爲之先府君導入黎源峒支黨所聚
處而守備鄧君已襲破老營賊潰而東格於途益敗匿遂進焚其
巢會諸峒亦次第破盜悉平知府鄭公惇典上府君之勞得給品
服以尚義良民旌其閭旣而銅鼓設守備黎源設隊長嚴田設汛
里中東北晏如府君更於西源瀏陽界山鄧君立功處貨其地招
佃守之表其名曰鄧公嶺於是豺虎之區通人跡矣府君智優而
多力琢二石鼓各數百斤鄉里元宵以當紙鼓之戲常侵夜過綠
林徒手斃數賊賊黨畏之故易有功

厚岡文集 卷十三
按本縣武備志黎源爲楊青山逃死地鄭公惟檄縣侯徐進兵未親來譜則謂當時大鑾作亂分巡道袁州鄭知府領官兵扎營高邨假府君爲隊長以先之此少異也又云與湖廣姜黃道合兵縣志亦有江西湖廣會勦之語而江西志引大志未及湖廣兵袁州志兵氛全脫大鑾事湖南志祥異云隆慶二年瀏陽土人馬保李大鑾訛作亂他無考本縣志篤行云嚴田劉冲宣子金魁當李大鑾倡亂黎源時前令徐一唯察其能命帶兵進勦不居功贈扁旌善蓋同時事

平寇附錄

西江武事志引豫章書云萬歷五年丁丑設寧州銅鼓石守備又引江西大志云先是甲戌年賊渠李大鑾楊青山倡亂分寧

據大幽山金雞橋等數征勦殺傷官兵民甚衆巡撫潘季馴遣守備鄧子龍密授方畧一營萬載之黎源一營新昌之黃岡一營奉新之百丈一營靖安之雙坑一營武寧之黃竹又密令數十騎溷商賈中分伏楚疆以斷賊西路子龍自督驍騎百餘人夜半入賊老營大圍山寇弛備就枕火礮四發皆驚潰斬首百顆焚死者尤多餘黨果趨黎源洞遇伏兵次第就擒大鑾復走安鄉將以楚長河爲援至丁丑南昌知府王三錫知州石漢莅任申明保甲文武協濟不旬月大鑾青山餘黨盡擒撫臣奏請增設城堡立守備等官於大圍山之銅鼓石爲寧州外屏分定哨五營黎源諸峒險盡在掌握可成內外應援長治之策袁州府兵氛志漏載惟據現在萬載縣營制云旱塘四處黎源

汛塘 外委把總一名帶兵二十名防守離城一百二十里嚴田

塘 防兵三名離城一百里株樹潭塘 防兵四名離城七十里演

武亭塘 防兵三名離城八十里

萬載縣武備志云萬歷三年巨盜李大鑿詹孔舜楊青山等三
駁分劫寧州六州縣官兵進勦青山逃匿黎源峒天井窩又云
舊稱袁州要害在萬載萬載之黎源與奉新百丈新昌黃岡峒
靖安雙坑武寧黃竹五峒俱通大圍山複嶺重巖有險可恃亡
命嘯聚其中萬歷三年江西湖廣撫按會勦李寇餘孽猶繁知
府鄭惇典檄知縣徐一雅督令官兵盡燬其深箐茂林使無所
窟穴始得平

袁志古跡參考云鄧將軍武功峽在萬載黎源鄧子龍破賊處

引大志云萬曆五年甲戌追賊渠李大鑿楊青山至安鄉尋皆
獲功遷銅鼓石守備黎源人至今名其峽曰破賊又曰武功
按大鑿等憑險為盜十年屢傷官兵幸巡撫潘方畧密授鄧守
備驍捷絕倫合五營導鄉勇然後破走之此二公之勞江西一
州五縣及瀏陽之民至今尸祝而府縣志曾弗之及汪西名宦
人物惟稱潘築隄桑落洲事稱子龍從大帥張元勳平巨寇遷
官銅鼓事既不詳張帥別無考疏濶甚矣大志尚具崖畧然子
龍未嘗追至安鄉南昌守牧所獲者乃盜黨非其魁黎源亦未
聞武功之目考蹟云云未審何據子龍喜為詩翰所至遺刻不
一銅鼓石亦有之黎源密邇寧不知借重其手乎五年為丁丑
此稱甲戌亦誤諸志大圍字多誤瀉今改正

元卿處士述

十一世祖元卿處士

諱

天曉好善而負氣鄉隣構難得片言輒解

然不爲豪家所喜或曲侮其族弱弟本支漠不省處士代爲籌直
之丁明之季多怪變地震水患河壠數易民貧病間起爲盜處士
年四十未舉于念無可致力者保社爲康公廟龜石灣冀以禦厲
豪家集衆毀之棄神於水處士戒勿與校迎像祀家中

本朝初定鼎縣猶屬偏隅處士營小菴宅右涼坑口塑金仙像招
僧化人於善順治三年丁亥大荒里族多死而滅神之衆斬焉處
士以重價售樅陽米負歸延活僅數口所娶黃孺人逝弟天樞亦
逝孑然顧影將遂爲僧親友交勸謂後嗣事重羸姪不可恃亦夢
大翁戒之處士乃潔齋集道流爲醮章追薦諸酷死者因以下可

否於天計日化楮財值陰雨處士匍匐仰天自訟風忽轉霽日暉
場以卒事溪雨如故也年四十五乃娶辛孺人又二年舉一子處
士喜曰吾家待之重生也故以爲小字卽英文公也復舉一女適
楊亦爲烟竹一族祖處士終身康強晚病目眊康熙二十三年歿
年七十七及見生孫三辛孺人後三十三年乃歿年八十八及見
生重孫六初度八十時子及孫隸文武庠者稱壽觴具訓導南豐
李錫序處士常云吾撫時閱變不自意以一髮延李氏氣豪盡矣
他無可道惟爲善未副於望以此自歉以是囑兒孫先贈公語榮
陞曰吾未得見大父然聞之大母暨父母蓋純乎爲善之吉人也
災祥志附錄崇禎九年十年五月並大水衝坑田地土壓爲山
低窪者水剗爲河民房蕩洗甚衆十五年五月復大水麻柵邱

仰寰聚衆結寨天井塌行劫破城一十二次至甲申四月方

撫

厚岡文集卷十四

記一

萬載李榮陸奠基甫稿

羽堯虛 翹

石生辛樹麟披鏤
佐臣湯立賢

鄧公嶺經行記

太溪導源鄧公嶺自高村西上可五十里祖谷層峰鳥道一髮其嶺西則瀏陽北則寧州跬步之間流分數郡攷之圖記卽首禪之前茅也峰有金架銅陵松光珠斗之勝棚棚連絡百十里僑民資竹紙以生歲賦主息十之一然習尙獷詐不時收則不可得償山旣深不可悉繩以理道壬秋之季朔甲子予從四兄入其峒戒之以期而坐督之已而兄以病歸地都無可與遊者咿唔稍倦啟戶

卽登山入秋益深如繪之花實隨步升降蟲鳥各專其樹隔峰酬
響各不思人山空夜闌作戶嘔啞四起聞叩所經行多涉瓊海泛
臺灣沂巫峽登峩眉者揚摧風景闕然可聽吁二百年前此山莽
爲盜窟自先祖從銅鼓公盪平以來始貨其弃地今太平積久人
得免於蛇虎之虞而稍蒙其利奚嫌於人客哉壬午束歸裝道以
一夫取高徑東南行越大西院升降凡三十里至黃皮絕頂積陰
冥冥僅南東數山青浮如側修鱗於巨海然北自黃蘗以上峰峰
魁嶷如欲進輒者大圍尤高橫無匹此外周天黃暈下濁上激雲
霧勃窳無風捲放不能測其變矣菴無壁瓦規石如城垣未累其
顛以禦衝飈云按黃皮小木也南楚多以名其山見於水經之注
字亦作黃熊見劉後村集流俗不知乃以爲黃皮二女仙也而祠

之矣未晦晴霽謝山出於足履下東行二十里經其觀高谷寬平
傳爲東晉時羽客謝仲初得道之處仲初本山下人嘗往來閭阜
華林仙蹟甚富而升遐於此好事者比之俗家衣錦唐時至爲帖
目以試南宮之士今像設乃爲王公服更稱靈運因靈運襲封康
樂而訛合於仲初可怪也七星池煉丹爐試劍石距觀俱不遠讀
書臺在頂南東眺望極佳楊誠齋贈劉長者詩所謂祇借謝仙雲
鶴駟者卽此其詩本集未載東行十五里至烟竹山甚環澗甚駛
長者遺園在焉劉後村詩燈與隣通眠未易備極庄家之態衝暝
行七里出高村甲午七月晦改定

湯周山脈 一名峯頂

宜春萍鄉萬載之交南幹龍分支東下其入首不甚高行三四十里至獲富跌凹起荷陂嶺凹北水逕後汊入蜀源南水逕金瑞寶山橋入袁河荷陂披左枝爲大關山正脈東行逕嶺東田心樓廈各村而爲鳳嶺是湯周之咽也陡拔十里爲西峰轉北而東蹴起北峯卸凹處其西行水逕南田柴田折而北會大關嶺後之水總爲歐江坑北入蜀水水之東行者逕長山冲入於禮山小河北峰所派據山之陰多美村湯周觀爲甲別有考正脈起東峰南卸爲風門垵有東菴曰峯頂山寺在抱中南值武功千疊入懷山南高勝以爲第一僧傳云馬祖棲托於此其巔有煉魔場明崇貞年東隅人鄧文輝碑述呂純陽真人詩云初一風掃地十五月爲燈

西江

志峯頂山馬祖修道之蓋其先以月光寺爲名罕人居元至正間
所有東西北三塔云云邑人黃昂卽其址立東菴馬珏三人別立西菴皆全真教迄明初
並廢天啟二年僧德心紹復東菴文輝其兄也故爲記之辛成才
謂聞之浴儒云

風門凹脈南行其東北谷水爲石阮駱家源難拚石湧雲泉自滾
鍋仙人溝湯周觀前北下五百步嶺爲東塘在大唐菴凹北與禮
山水合爲小河北逕橫山大坪高城窰入於蜀水湯周二仙東晉
時仕隱具志書其來最古且山之本名也花園雲石溝鍋諸迹具
在觀則久蕪風門凹西阮帶東庵前名曰鏡阮其水西南流經半
升米冲北壇入金瑞河
凹南復起爲橫山右臂止於鏡阮左臂引而東爲帶石峯划船峰

暗冲大唐諸山盡於高城窰其小東南行轉北合禮山小河左臂
分引而南爲谷源凹爲馬壩砦東引爲牛跑嶺鶴嶺望府嶺盡於
縣城北西門其水東南爲眺景阮入小石窟竹山洞

正脈南起爲大元嶺雙頭柳龍樓天馬等山至柏木乃伏而東轉
脈西之水由金瑞入袁河脈東水合竹山洞滕伯周家市水爲龍
江穿縣城以北入蜀水

正脈伏復起爲圓嶺東北轉爲星姑嶺爲鷺鼻峰爲浮樓山峰爲
平兩逆以西爲坤山盡縣城東南門

峯頂山在蜀水南首尾★十里開張如岳枝峯四蔓多勝游其近
縣餘山往往起高巖抽秀嶠含邃洞不可勝紀惟瀑布未闔耳自
浮樓以東若末山蒙山何山皆湯周之所出盡于瑞河口與蜀水

相終焉

湯周山彙考

太平寰宇記萬載縣湯周山在縣西三十里相傳晉安帝時湯周二仙修道之所

袁州府圖志萬載縣湯周山在縣西三十里延袤峻峭巨石清流遍滿山谷晉安帝時有湯為青州壽光令周為洪州南昌令值國度不綱湯慨然掛冠謀尋避世之地遂隱於此故山以湯周名郡縣志其山周回四十八面昔有湯周真人飛昇於此故以名焉

宜春志萬載縣有湯周廟 又云紫微觀在縣西南三十里奉湯周二仙香火

縣志云湯周觀在縣西四十里湯周山宋乾德三年道士劉大邦

改為紫微觀元至正庚子道士洪範重修 又云觀後有花園自園而上四里許有碁盤石上至山頂有試劍石石上有題詠山高極目若不可窮每寒威初霽凝華積素宛若畫圖故舊志入景有曰湯周雪霽

唐人湯周山詩湯周二大仙廬此得昇天風俗因興廟春秋不記年錦雲張紫蓋琴溜瀉鳴泉丹竈猶存鼎仙花發故園宋楊傑湯周山詩樓臺深隱白雲堆試劍猶存寶匣開水噴龍雷蟠勢起花敷錦綉陣香來石壇餘礎留誰飭丹井疎桐自昔栽古木怪藤因問訛仙翁瘦鶴又驚回

俱出宜春志

縣志吳大常節安福人成化初應邑令潮陽陳燦之請首賦八景詩湯周山云二仙傳道論元宗共駐西南第一峯此地至今留鶴

駕雪晴百里見琳宮

據此明中葉觀猶在然大常序云時將北轅不及一造原非目擊也黃景宋九儀潭延觀

諸作不錄

宜春志峯頂山在縣西南三十里高可望郡城有峯頂院

縣志云峯頂山相傳馬祖修道之所舊有上中下三塔今中塔存

焉有泉清冽禱雨輒應又傳古有月光寺呂洞賓和馬祖云好箇

月光寺只少兩名僧初一風掃地十五日為燈 又志古蹟云燕

王寨在湯周山鉄槍石壇尚存

陽樂古縣自吳至唐初三百年人物寥寥康樂公食封累世考

之史未嘗一至惟謝仲初湯周二尹真蹟不朽耳晉之南渡天

下中分而仲初入謝山又七十年祚將移二令君掛冠登南嶺

兩山鬱然相望其人與東晉相為始終然湯周之避世元亮儔

也同籍同官又同志同得勝地圖經但言其慨然偕隱後代乃

有真人飛昇之說存而不論可也元亮云富貴非吾願帝鄉不

可期二尹固無別趣然觀其高情定力超然氛埃之表雖託乘

上浮何以加茲圖志湯周山注述二尹之蹟得其概近世志縣

者刪裂其文以分配山川仙釋而改青州為靖州以靖州古高

安也於地為近按晉唐地志南昌縣隸揚州豫章郡圖志作於

南昌歸洪州也武德五年更豫章之建城縣為高安置靖州所置屬縣

望蔡華陽宜豐陽樂無壽光壽光自屬青州之樂安不可改也

又云二仙俱廣南人考晉唐時廣州俱首南海郡宋因有廣南

各路之目志云云尙未知為何縣人也山在唐人已云興廟不

計年其蹟遠矣故原圖止有湯周山志別條云峯頂山者自目

山頂之院如西屏山嵩林山等不必有山也今俗乃以院名奪山名亦由近世觀廢而然後之志縣者湯周宜專以名山峯頂宜彙入觀院乃爲得實

大綱山脈

大綱山南龍分幹也自武功山逶迤東北二百餘里涉萬載西境爲鐵山右帶黃茅村東起金鐘湖嶺折而北爲大綱山

大綱山南面東頭名碁盤石坑 次西鐘入樓 顯功嶺 紅藤窩 次西風車紐响石窩合爲三义窩其水南出東坑西南流爲改江

大綱山南兼西面爲大扇洞相見灣合爲高橋頭 又合西頭大西坑水以南合東坑水爲改江入瀏陽境經巖前東有許布尖三爪嶺西有巖前尖此改江之水口也又前爲沙溪爲成潭江徑大橋窠江右合上栗南水萍鄉縣水轉以西爲醴河入 於湘江 大綱山心金鐘湖水西北下老龍潭其北面小湖塘水下猴子額

下至小河墩合流西出沙灘在紅沙下二十里入小溪河徑蔣步江又西合大溪河爲瀏水帶瀏陽縣城以西入於湘江自山心以北皆瀏陽境

大綱山東面南頭仙人掌下水南出源頭冲雲峯洞背喬廈轉周陂橋爲黃茅北源合南中二源其南源水出鐵山界中源水出楓柱凹東徑燒田段至龍天壩上首與南源合又東至周陂橋合北源水東經仙居橋路下左納源頭段水東少南出方木山車陂頭池下入楮樹潭水爲蜀江勝舟行

領零砦值黃茅村南約自幽蘭山發脈鐵山之祖也其砦南爲大水源東出棗木橋入慈化鄉等水以東爲朱溪橋徑葉家墩滑石江注楮樹潭

黃茅西南至慈化旱路三十里南東至楮樹潭二十二里池下二十五里潭埠三十里東北至東阮五里十里不等金鐘湖十五二十里不等

白水陽程橋西行五里入西阮凹五里過羅家橋上七肩嶺十五里到茶亭五里下墩

大綱山東面北頭西陽湖水出軍屯嶺由羅家橋入白水又北騎烟山來脈水合木馬段水出軍屯嶺北由南江瀑布至西阮入白水一又北騎烟山水東出沙冲由陽姓祠上首入白水皆白水右源也幹龍帶騎烟北東爲楓子嶺白水中源出焉爲龍界嶺小穀皮尖天子岡等白水左源出焉南行老山下合中源水又南合沙冲水爲白水穿陽成橋東南行左合東坑水右合西坑水又東

南左合尖山下水右合羅家橋水自陽成三十里至潭埠流入蜀江

金鐘湖之名南昌西山有之在天寶洞上唐則天賜萬振金鐘玉磬後遺湖中因名周廣亦不過三丈見寰宇記萬載西鄉金鐘湖未詳受名所由特丈許宸田耳按字書宸音蛙說文汗袞下也策國宸邪滿車字亦通窪汗老子云窪則盈孟子洿池汗池或作去聲讀同義此山東南麓有村名宸裡即以地下鐘水受名誤宸為湖而名又美前後志家遂繪作湖形表以為筠河之源分度圖因之引以西近醴水乾隆癸卯萬載高令初謁巡臺飭徑從陸勘此湖然後之任蓋不知入誰何之言欲分導湖水東起蜀西通醴以省袁河起陸過楚之煩也大抵亦為前後志所誤舊云龍江源出瀏陽界金鐘湖此語已欠分曉縣志云金鐘湖水分二派一東入龍河一入瀏陽江西志

同不知此宸不但淺小跡非平地從山頂北入清瀏亦不東注瑞河予蓋親驗之

太皇山脈

幹龍自白水尾凹東通花橋山凹南逆劈大枝數節即起陽峒嶺雲樓上其山西南分行為仙奕石太皇山山高平據諸峯中故全山氏之又西南為卓筆尖尖分二支其右南行經新田伏脈為石山東抵柏樹街西盡潭埠東岸其左為書堂右凹為炎黃聚盡苦竹山下太皇東去之山為書堂左凹帶白楊寺後為樓下右凹伏脈為石山經黃龍擺尾盡於龍田水口卓峯為人形山別一枝包少江而東走盡於浩石鈴田陽峒左支為荷花池龍會等山

陽峒嶺右枝水出卓筆尖風門凹東南流墨犀漕至新田下與中枝水合新田脊西之水出排江入白水在因果橋下二里

陽峒嶺中枝水出太皇山至書堂有洗墨池如梳形東南下窰裡右折歷苦竹山下與右枝水合出山口左合白茅坑右合門江至柏樹街昌田堰入蜀水

左枝水出雲樓山由謝家莊楊柳冲五神廟東北折白楊寺前東過樓下折至白楊店南過鏡山與花橋水合

卓筆尖南下第一凹水面西者入白水第二凹面東西者俱入白水幹龍白花橋之界嶺東北行去株木橋之界嶺長僅里餘兩界嶺之中東南劈枝起神嶺跌脈逶迤水倒西爲南源水倒東北爲白竹源青山頭正脈東南起二樓山伏於田中又東南起望湖

樓一曰望府樓伏爲神仙凹又起石山連延十五里伏於九里佈又起南畬嶺東走爲金剛嶺又南伏而起爲黃花佈盡於官莊花橋水西源出黃竹洞東源出界嶺上洞下洞各行五里東南合於中段又五里穿迴龍菴橋口又六里抵礫下郭山段將軍山北左叔神仙凹脈水東南行歷嘎陂虎山南折而與白楊店水合東南過霜田折西南過龍田出口東至鈐田入蜀水

太皇山說

宋時清江楊君申記閭阜以謂崇正鎮地因方爲望引上世天子巡狩必升高燔柴爲民祈福然閭阜不必有蹟也泰皇見秦始皇本紀與天地二皇並稱卽人皇也兄弟九人分理九州爲九皇輔君臣如五皇之宗皇伯五帝之宗黃帝其民亦各崇其號曰皇古

尚質故循稱至今泰太音義同江以南多有稱太皇山者萬載西北有山高橫南與王皮湯周相望其巔夷坦如有壇場遺蹟疑爲遠古荆揚間邦君巡祭處附近天子岡在北王駕坊將軍山在西南遠民思過化之德而然如五帝葬蹟徧於山海豈嫌多哉其支峯若卓筆尖書堂山洗墨池儒術存焉若雲樓雲臺仙奕石壺公塘神嶺神仙凹五神廟則仙家之所遺白楊寺因果橋金剛嶺迴龍菴又佛學之所附周圍不越百里勝覽頗著擇其一二振興之宜有好事者哉

黃皮山遊記畧

厚岡擁籬右望黃皮如修眉而去之四十里十年未一遊新菴成之明年予旣釋服急大事思寓便一往五月七日丙寅用之督開新路於鶴翎灣黃皮漸近胥子敬中自縣來訪相將過杞阮蔭竹而坐聽巖泉風致蕭爽以暑威方熾留二日回自後亢彌甚江湖之交稻且稿於陸供頡益以無具息足樟阮而已秋仲涼生念客不可待承之晉之請隨行

初八日乙丑由烟竹村登嶺間關至綠竹塢在杞阮上亦七氏庄也山氓秣履來迎曰比師日者入頗利於農與游盡富貴人矣索其本視之塗鴉橫斜才數百字徵詰不能答富貴人之甘誑于星命歟將天爲之術以濟此飢民也飭已緣登其西脊此虎尖所指

爲叢木者也環山不相逼遠眺亦宜北下涉溪宿平曠

初九闕新路初匠氏規省費高低勿治以夏中之再督也前後去杉竹無算至是路大展卽之欣然行人指目焉噫生平多求全之毀以此歸譽胡爲來哉南渡埠橋橫紉入高嶺村塢相連黃皮東北麓開張處自此路漸峻十里至半山庵往往逕茅舍穿水田松竹重掩未覺山深僧金華年八十餘不出戶已久猶相識爲設飯又上五里至萬祝寺山高陰重氣寒利以度夏僧羣如麋鹿難與言又上五里乃至頂黃皮孤峯也西北自九龍迤脈來謝蕪東受之而此山當中特峙四向昭昭各山如武功大仰玉筍西山楊岐幕阜之類隔府縣相望高者兄弟細者兒孫有如程遠近分多寡以位次之然後錯以林廬涵以烟景覺數百里間地上所有悉爲

此山裝綴故當推爲縣中勝遊之首日車西轉嵐氣下霏諸山不
太了了東天特鏡淨萬頃霞鱗鱗爲颺所約蹙成金線橫帶天腰
俄頃日規負履而下月弦光切肘臂間平地無此景也僧來邀入
堵風城在頂南角高可二尋厚稱之小屋數楹脊低於城三之一
予二十年前來此菴就垣爲壁風勁瓦屢摧遂中敗去歲西麓印
姓竊城感山神夢驗以其願力新之猶記前宿菴值九月寒甚僧
焚大樹取煖風東西來相鬪空際有聲如雷今屋庇於城無風威
寒亦較可邱君之力也前老僧語予云黃皮頂凸無回崦環山峻
削每凍雪封菴火或斷山半僧無力能救遂至餓而死春夏濛雲
數旬不解冥冥如舟泛海牀敷衣物淋漓非苦行絕俗人莫能住
然其雲或值晴風颭而下則平鋪無際直概四天如白玉地其上

遠峰四五兀然空舉鮮翠異常或雪後快晴及秋宵月滿卽之覺大地頓湧銀濤跳天蹕海駭目尤甚然須坐守旬時纔一見朝山者率交臂失焉予聞此已久結契於心恨不徇徕遇之

初十昧爽冒寒再至頂氣甚清日規鎔紅而出其下有如黛影分天甚長俄入濛氣中無所見不知爲何山也其間光點錯雜如觀星宿海色紅白不定蓋極遠潭湖映霞氣爲之已而霧動地漸化爲湖零山斷壘遊鯉驚迸東南面尤沈滢然是地底遊霧非能升至山腰如老僧所云也僧適以酒至盡二觥寒少止覺目有眚不敢極視秋分未遙

初三庚申日秋分

日出入中道一碧罩空晶光盪射在

此山蓋爲常景下方人乃如剗得之霧旣淨遠近村落畢現樟岡形勢如觀掌文矣餘後循右翼以南十餘里下抵霜寮村涉澗登

鷹嘴嶺三爪嶺撫企人石憇廟冲遂下前村覓路東北抵石馬漕其上爲東港黃皮東南開張於此聚龍菴在南岸其後高壁與三爪相連孕石駢白如牙長則爆而鬢遊人脫去以爲玩永興廟頭河多此石或云吉安某山亦有之予就宿菴中月色清溫有飛蚊謝氏子攜酒肴來餽云視昨晚差涼矣山麓與頂氣候殊絕如此十一涉右溪上曇貝嶺中途少許復升遂達觀之前山午後憑僧周覽八九峰訪讀書臺據高而勢坦王皮正辰其後知長者畸人也暮宿山中

十二下山東北行午飯爐鍛店過茶蘼凹登松嶺躡脈數里左烟竹右岐源陟更古之巔延矚而下歸於厚岡是役也不專於遊不及徵胥子然當以暇次第之資其卧覽焉戊戌歲乾隆四十三年

南嶽志形勝雲龍峯在嶽廟右有栖真觀西漢道士王谷神皮元
曜修真之所

志仙蜀青城山道士太微先生王谷神太素先生皮元曜同渡荆
渚泛瀟湘至南嶽卜菴於金母殿胎息還元數年道成

過大榆壺仙二山記

高村南至縣七十里謝山峙於上游北枝所派大榆山爲大南麓
所放壺仙嶺爲極大榆連絡小嶼荒山之交梯田雲構東西相望
行李往來下出腰肋前後其中隆土成峯三巨石爲之冠焉戊寅
八月予自岐源來登秋霽天高極望數百景興意并益紆路以窮
其勝山之陽谷泉十數其偏西者合謝山諸流以南至於白良爲
錦溪可堰以行簞溪之上下聚落數十百家在元時黃氏敖氏衣
冠甚偉與草廬道園遊者數輩圭齋歐陽氏橋記云水源於錦山
今以地求之卽謝山也然未有舉其名者連山北盡引趾坦然遊
意有餘明日辛爲霖龍文采來會遂取徑於壺仙其巔亦有石孤
撐可怪昔之人常規爲宮以祀之文或爲瑚仙綴文之士留咏焉

壺與狐字易混不知何時宮廢碑毀而山名爲土人所訛莫有正之者噫萬載爲江西僻縣山川人物罕見稱於前代然吳虞歐陽之文章翰墨所以貴當日之間巷而傳於本集者亦多矣僅今數百載記刻無一存土人尙不識諸公爲何如人況於附在交遊如黃敖諸子安能傳其恍惚哉至於謝山方山二氏之誕幻傳記固已不道餘波爲大巫狐仙其說尤鄙易爲擯斥然其家口耳相承卽爲改實至今勿替而益張孔子曰文獻不足徵也十室之邑必有人焉今流俗之所矜重者乃如此可歎哉

登鵝鼻峰記

東庵迤右有峰曰鵝鼻奮臆抗首如伏而翔相傳虞文靖公來縣時所指名辛秀圃孝廉移家其下且十年病其峻未能登歲戊寅予館東庵五月初吉孝廉來宿戒行期先生體素弱知予有仁者之樂亦因以自張也旦日取平道右入東旗之谷十里而至王家凹有莊踞峽內林廬環簇呀然成村從者皆忻然然有憊色稱觀止先生曰不可則相將左折以上未及巔避雨稍下雨度復升陰靄中萬象沉伏無可觀者相將東下卽於麓日已晡道旁有胥氏之館爭入憩焉蓋是日結伴四人孝廉年最強步最弱胥明中辛成材皆壯年亦次第倦予固不能健行者故其遊也爲休也屢坦坦施施以談自適窮日之力取道不過一舍而任屐之勞如經萬

里然嗟夫士君子捲名藏跡役役山林間豈特以適其心而筋力之用庶幾習焉以不窳而薄於稟受者其趣乃爾可勝歎哉此峯南附於浮樓而西接星姑北與望府嶼相望皆巍然絕出丁丑之秋予寓天陂之金盆村賓館有辛丈復旦者方鳴詩律以教弟子諱老而嗜遊暇日盡諸山之勝攬蒙茸值峭嶮翁則前驅其家值望府嶼西常邀宿焉觀其意氣超邁五岳三山褰裳可到此其抱具而未試者歟甲午七月晦改定

南村洞山遊記

陽樂溪山各鄉異態而以岩石知名者城南爲最暇日當以次第盡之戊寅三月十八至二十同胥明中

銀山洞在縣城南少西十五里其巔曰脂蒙絡爛照如銀故以山氏之諺云銀萬載亦以此耳食者遂謂縣境內出銀妄也山四削而頂平土人就其上構砦以避寇故西麓之村名曰砦下凡洞多陷山麓下此獨高舉巖端列牕西向如四明之著稱寧波故應推爲絕特而縣人不知重予從妹婿王某居山下聞予至具酒相待問後戶緣山岬以升石夾道如梯階將抵壁巨石摩空級屢絕衆手援引泊於右洞之闌有二戶左翕而右張俯入于房天光漸微如乍暝左穿十許步光一線注壁纔如晨又左穿十許步壁光微

入下俯蒼蒼不得其底燭其暗石質膩白時發金色燄燄他無形似者出洞循故道下白日中陰氣黯如也

寶峯在砦下西五六里左岬有寺僧與明中故相知日哺時憑之道登其頂面北以望正值諸溪之委去二十里歷碌城村如畫外則重巒一碧梯烟逕霧去鳥無窮轉而南大原諸峯爽氣切襟心甚快之明日鼓勇西行十餘里躋東峯之角不可極而止

石林在太原北麓處處石如林有剝焉當宜春萬載之交聞前時僧頗習文墨以招誘儒士近有如蘭者稱善圍棋比予過訪皆不在惟酌博者專之賓主喧喧負此幽棲矣

虹蜺坑在石林西北未至數十步半山間水聲雷殷下求之有大石隆起跨谷口爲虹橋其下亂石撐拄水從上洞來激石分布中

支冒圓石以下其頂中準其腹中規餘泉唾珠噴霧左右取捷耳目爲之不給其右復有穹石踞小谷爲蜺橋其下泉甚細流石成形甚怪兩橋連蜺雌雄相伏皆天成絕景然尙恨其近水如人鬢雙虹假令拔起天半與銀洞競高則天台羅浮難爲伯仲矣

竹山洞在黃村之北其水源於虹蜺石窟流爲大溪表裡通透十餘里其中流石怪狀志縣者品爲諸洞第一乘漲可運簰出入或候水落揭蹠以往逾雪山拂龍床窺扇子之關而止內則龍神居之遇旱羽人銜命造請常得雨韋侯明傑有記甲午七月晦改定

大陽山遊記畧

大陽其高勝顛柏壇南距萬載治百餘里距予居高村猶四十里
神司雲雨環山民歲以春秋朝之不知所自始而地阻深城中騷
不見故縣人稱山首湯周王皮不知其尤高出也自予兄弟好遊
始發之北城胥明衷牟村汪清貴愛山如命丁酉予踰大祥二子
恐後遊偕集於厚岡之塾會連雨主客蕭然予曰大陽其以此謝
適客乎二子奮然曰不掃衡雲吾駕不迴已而果霽從兄本衷悉
山路策杖以先七弟維翰繼至與予共五人小暑後次四日也透
蛇北行過中古嶺山入清瑤巷九頂東麓絕勝處披茅掃石而坐
水聲迫人不得相語溯行十許里抵板坑午飮藍開皇家雨霏旋
霽復溯水北上觀石於鉄彈川凡十許里進上坪宿呂雲冲家高

樓豁達新月映池中天鏡淨無暑氣

初八日壬寅從莊右踰一山入龍門清泉宋志云羣峰環聳中有
凹路狀龍門又云泉自大陽頂上十八折入武寧清泉院在其上
今按此路澗石不雄聳無門形山以南水無入武寧者亦未聞有
院縣蓋有兩清泉其一值仙壇尖南去城僅四十里舊院存焉志
誤合歟不然則此路蹟廢多矣循澗東北行峽勢轉開田鱗積如
村落可數里登分水凹鳥路如絲掛空盡二十四折稍夷夾路多
瞿麥龍胆秋羅之屬百合連畝一莖數十葩飢民恣磨其根以代
穀他雜卉亦夥杜鵑有絕老蒼者山半以上石多奇雲漸來迎人
山天混合恍惚棹楔橫前導者曰迎牌石也過此汗霧漫騰下晴
上暝如頓入異界時於霧綻處闖見林廬一二片浮動如危檣簌

海其形纖密翠鮮又如黠黠中窺遠景蓋數十里下所遙映不能
指爲何境益上翳益厚氣益寒目顫搖如不可任大吹聲自天來
相擁覓路至草菴附火啜熱良久神旺鼓勇板其西峯乃大陽最
高處也勁風如弩重霾揭消俄焉萬巖披伏如穿地底而貯雲空
諸客心氣回易皆不能措一語縣志云大陽未旦日光先射就昏
不暝驗之不誣耳頂北水入寧州東入新昌南入萬載游人隨企
一石尋丈間適當三郡分水北視銅鼓城如黑子贅左腋下懸境
南右肘間外山綿疊空際攬絡爲一却溯西南來脈則祖武功宗
金湖大圍黃皮張兩拒一大物中蹲遙望如穹背獸之如百足鰲
東北直馳千里爲八疊華林洪屏鶴嶺以屆彭湖其分劈南中巨
幹比之湯周尤雄勝云南北巨壑長村數十荒遠不能數以爲僅

周百里者失之矣復退入于菴菴倚頂稍東而當窪處外山皆不見菴中人如在平村小塢不自知其託體高也當中石室東向以祀神旁連屋卑陋一全真守之間其神曰黃蘗仙娘本晉時仲初氏居謝山有道術三姑分修於王皮谷皮黃蘗皆仙去故三山香火承至今問何以氏黃柏曰無有也西枝有皇姥壇此亦傳稱皇伯云問遺壇曰今石室是按瑞陽志山絕頂曰鷲峯有梵僧謂此山與西土靈鷲無異故名以予論之西竺所云鷲峯者以峯石青峭似鳥喙而云然大陽則土山博厚且去天竺二萬里何庸襲其不類之號女真果出於晉時亦因山得號非山所由名然則皇柏之來遠矣他蹟有迎謁御駕颯風之名上古帝王巡蹟遍天下率因名山治壇宇升中於天春秋命歷序有皇柏氏字亦通伯在三

皇時駕飛龍時巡其殆是歟山岷口耳相傳萬古不做異學特承聲引重爲談資可耳階前有井灑水甘潔天乳也瀹茗肅壇遂以供客香味絕勝姚雪坡與許司門黃蘗山茶云可攬書傳之香雪坡得山茶未必得山泉惜吾輩胸中枯澀負此水可笑也日逾午厨無烟出囊糗取飽悵然西下緣脊賞戀奇石多至數十座十里抵凹路蝕於草迤南十數折得呂氏別莊息焉飭後沿行朔祖嶺蓋大陽南委之支右則清泉逕上坪而下回山出於藏溪左則瀑布水上承天乳經黃蘗寺而出方塘皆入於蜀水唐宣宗微時遁此地與禪僧希運聯句所謂遠看方知出處高卽此水也事見陸務觀避暑抄及唐溪詩話予欲順道探黃蘗日昃途遠衆不欲乃改逕下嶺躊躇中坡至周源村已昏黑扣藍開鳳書館生童皆喜

治具行觴酬客足目之勞焉

初九日本哀維翰先歸予偕二客沿行東巖嶺陟銅盆之巔反憩於草菴僧他出山氓張老攜酒肴來留之盡爵午後西下巖田憇光梵寺寺據平村中五名山四環有勢亦希邈所立屢經修改今就毀一僧憑以沽酒其礫刻咸亨某年字汨沒溪濱好事家宜護之此皆黃蘗分支也唐以來釋稱五宗儒稱五子黃蘗寺切大陽東南麓登望仰山百丈可指數五宗分其三而臨濟宗風幾盈海內盛矣哉然求如五子其人寥已且在近非無過化可名也此間往蹟浸復湮來賢難預託悠悠天地其若何別路過長漕濯熱於龍牙峽勞二子曰觸熱褫襪如此山若爲相酬曰荒已甚非獨難爲足目亦難爲給是行也前後衝雨嵐林嚴霧登覽之適僅少頃

殊非滿志因舉在山西崦處戲言此地高衍宜招好事崇精舍奠古皇合禮壇者有所屬厭若然客遂能動籥雲而上林否客笑而起日已仄蔭山影過即月夜抵家畱二日別去

大圍山遊記畧

南龍劈脈內轉而勢最雄者首萬羊而武功大圍黃龍以次北趨
迄匡廬乃盡皆穹窿秀絕干雲雨而絜巫衡稱江以南巨鎮焉匡
廬尚矣大圍次洞天之十三唐杜光庭傳白玉經云周回三百里
爲好生元上之天在潭州醴陵縣潭州今長沙而山在瀏陽東界
非醴陵也水經注瀏水出瀏陽縣東江州豫章縣首禰山導源西
北流今寧州乃豫章分地山正在其西界宋歐陽忞輿地記云首
禰山頂有白沙湖廣五十餘里流分四派一爲瀏水其三入岳之
平江豫章之分寧袁之萬載四皆盤踞四縣明一統志用其說湖
南志云大圍一名首禰在瀏陽縣東北一百五十里東接新昌西
江志云大瀉在寧州西南一百五十里東通新昌南通興國今按

大瀉山在益陽唐釋流取以配袁州仰山曰瀉仰與大圍音同蹟異而與國亦懸在山北西江志所云皆非也大圍西則瀏陽東則寧州諸書併舉來去各山故有分流袁岳之別南來天井欄水東入蜀江北去連雲山水西入平江而天井東枝爲大陽東接新昌連雲北引過黃龍北通興國則益推廣言之耳大圍旣聳鎮江湖其支絡遠延皆獻秀狀第就本山計之一脊橫陳五六十里繞麓三百里並四拱之山周迴不啻千里足以名岳矣道書于大洞天多荒誕如王屋山虛言周迴萬里惟大圍爲得實歟高村在山東南百餘里記所稱水入萬載者惟此地足以當之路穿穹嶺曠日無人故遊願久不果歸自湖南之明歲丁酉秋山民毛氏來告曰某比得祖地於鄧嶺因是以逾黃洞三日可達西峯之巔予甚喜

時方構館于樟坑輟業從之以九月初七日發高村十六日回在山巔僅二日遊事極草草然于山川方體百一徵焉是不可以無記蓋此山絕勝約有數端他名山多驅使巖石神鏤鬼琢離合以成竒而大圍際天皆土望如陣雲自然巖整一也他山過于標險未銳或不可措足大圍四周拔起三四十里至其巔轉迤平村塢通達經行累日不厭二也他山攀陟未半已憂枯渴而大圍愈高愈潤空水相涵反動人江湖之興三也他山聚竒山內而夾輔難勻大圍各面所臨兄弟兒孫依之連體數百里爲一叶大圍之名四也此其犖犖尤大者至于峰巖潭瀑一方一曲之竒世據其中者莫能悉其涵孕若斯宜其參錯海內名山爲十二洞天之次矣山北有月影十年前木陰霾徑白日中猶如夜行山南有星影絕

崿陷竇通光西峰有雪影秋時蘆花掩苒湖山間類鋪雪遇風起
花颺尤飄瞥亂真焉牛嶺以上氣倍寒冬夏雲雪分據之湖南志
大圍物產無稻而多藥藥味大抵苦寒蘿蔔特肥顆以數斤計他
花實與下方亦異予遊近霜降紅綠高下續紛然茅深虎跡多不
如中春燎後可舒步也徇西峯時問東道無知者其遶遠荒涼山
岷老死絕不往來不知古之高流及志家何由標而紀之博識哉
然亦有違實者白沙北麓村名也山頂玉泉諸湖注此爲大溪以
趨瀏而諸湖惟天心形員底平周約千步積水澄澄餘率爲採藥
者所決僅存沮洳而記稱白沙湖廣五十里水分流四縣計山巔
南北相去十里許何地以容之此皆山經好奇如所云長白山潭
廣八野之類也然予嘗遊匡廬躡漢陽以探瀑源其凹迤平瀟灑

數丈外卽聚爲流泉求分此山黃梁夜珠半畝之水不可得其他
山頂顛然是知諸湖之美亦僅大圍擅有之古人所以獎借於斯
歟嗟乎以茲山之雄也然其四暨無有名都會道路往來無託足
之所仙佛之徒中衰所以名雖震於往牒而探尋者少反不能比
於武功黃龍則其深沆沓絕之趣未知幾時乃悉標著於人間爾
爰次數日目足所得錄其名傳諸好事者
南面來山

外層最西幽蘭山次東北鐵山次東金鐘湖山次大皇山次神
寨次九龍蒙山次東南抱古曠次東玉皮尖次謝山已上連絡
爲一

內層最西龍樓山次東烏湖山次劍林尖金盆架次東北鳳凰

山三界山天井欄山次東北金鈎嶺次東大陽山以上斜絡爲

一 正脈自蒙山北引穿金盆架鳳凰山三界山北起董家尖時燕

嶺望大圍端整如平臺熊鎮天萬山奔命又屢起伏極于血

樹垵幾與地平乃挺立開大圍也寰宇記血樹山在分寧縣西

縣分界山多血木故名又按分度圖血樹垵值緯經俗亦稱鉄樹

北而去山

未到俟補錄

西面圍內山

幕阜黃龍連雲九嶺蘆洞大光襟其右

湖南志幕阜山在平江縣東北九十里接江西寧州界左黃龍右鳳凰皆在山麓。黃龍山在巴陵縣東南一百五十里接平江界早可禱雨。連雲山在平江縣南五十里

水經注謂之純山岳陽風土記在幕阜之南峭拔萬狀嘗有雲

氣覆其上。大雲山在巴陵縣東少北一百五十里高亘數百

丈連接七十餘峯上有龍湫。九峯山在縣東北一百里東接

大雲山勢高聳九峯並峙可南望洞庭。蘆洞嶺在瀏陽縣東

北七十里北界平江南接寶蓋山石逕盤曲一十八灣。一統

志大光山在瀏陽縣東北九十里北抵豫章西接巴陵峯巒疊

秀亦名大皇大綱幽蘭帶其左皆高入雲際與本山兄弟也二

大光洞溪之間羣峯合沓如寶蓋石馬黃曇楓洞俱有名其高半于左

右爲本山兒孫坐西峰五子石一攬可以盡之

東面圍內山

未到

修源

修水南源名址河出大圍山中峯琉璃崖南下經挂錄石龍鬚

漕抵于排埠鉄垵水自右來合東過杉橋左合大圍東谷諸水

右合梅洞水總成一溪東經楓田過銅鼓石下石屹立數丈類
銅鼓形名勝志云許旌陽捕蛟至此劈石取之劍痕具在有城
壘其上寰宇記云分寧縣旌陽山在縣東一里獨立峻秀烟雲
迴泊許君曾遊此故各似非此地又云石柱在縣西南
二百里都江口風俗相承呼爲南山神石周迴二百五十步四
面如削成柱下有神頗靈驗未知卽此石否應考西江志
址河東與北源會

北源出大湖山東南青龍山大阜山左右收數小水東南流至
城東合南河長俱近百里

二源相合爲修水北東流經江頭轉向北又經山口等村凡二
百里至崇口有大湖山水西南來崇鄉水西北來合爲一東注
之東北行三十里帶寧州城東其下流曲折東經武寧建昌至
吳城鎮滙于彭蠡長可八九百里也漢地理志豫章艾縣有修

水東北入湖水經注循水出艾縣而東北逕豫章寧縣又東北
逕永循縣又東北注贛卽此水

按寰宇記引水
經註仍作修水

瀏源

瀏水小溪東阮水源出大圍山中峯湖嶺之南天泉分貯爲長
湖打泉湖水深叵測遇旱鄉人從巫備儀以禱龍龍則怒波騰
雨沛又有雲罩泉諸水合爲東阮西南流左合鉄凹西水以西
過楊梅坪東源水自右注之水上承山頂大王嶂偏擔凹諸水
經星影石而南合于東阮水又西至上洪西源水自右注之水
出猴子額高峯南合石鼓山村水下注金鐘磴廣淵叢瀉漚絃
若鐘或傳長沙某寺鐘飛伏此潭時有見者亦分宜鐘峽之比
云又下叠爲懸泉石山對抱以南入於東阮水阮水又西黃洞

水自左注之水出南山銅淋尖百丈漕其端有洞下垂如鼻泉
懸入中間色如漆其水下合衆谷水西北流經黃石洞夏潦決
漉成川秋冬伏流地底枯沙彌望十數里峽蓋水復現西北至
上洪合東阮水是爲小溪溪水又西西阮水自右注之水上承
山岬夜珠湖湖當昏晦遠望若有光以山豕嘗浴于此故一名
野豬又有黃梁湖中湧數小山芳林秀美人跡所絕近湖有
髻石女冠石山半二十里下卽望見之叢石崒嶢可愛一石駢
舉而中刻各鼓架一石高峙谷中各將軍餘不可悉數其水南
下經桃坪庵址楓樹坪黃泥界注於溪溪水又西童泉坑水自
右注之上承石祖嶺泉沸發亂石間大圍之西峯也下經童阮
注于溪溪水西南經石陂至陳家坊烏湖水自左注之北源出

東山洞淋尖三角塘南源出東南蒙山瀾口垵會於古塘西經

蘭江礫包家冲烏湖李氏之居名烏湖水西注于小溪

湘南志石馬山

在瀏陽縣東九十里接萬載縣界亦各石馬洞有巨石如馬洞
湖土肥有田百畝流泉灌注大旱不涸按今瀾口垵界山西爲
墨州東爲竹馬均有洞名乃地勢阻深非巖竇也其名塘亦然溪水又西至紅紗市岸平濶板
橋低橫挾潦可浮輕載又西百餘里右合於大溪

大溪源出大圍山中東峯三灣凹上庄高泉迸灑北經牽牛垵
千坵墩山半之村也下抵黃泥凹而西右合凹水爲大溪西流
月影水注之水上承大王阮諸湖水穿月影北下注于溪溪水
又西白湖水注之水上承山頂玉泉村有寺踞泉上游中有人
形石石盤八稜石蟠龍石自麓抵寺四十里連房幽閨斲爲溫
涼洞搗婦人佞佛者好之後事發僧以罪駢誅寺遂廢前有蕪

池其水出石關左合玉泉泉大如輪側有店址寺所置以待朝
山者今亦廢泉下趨白湖湖亦決有稻數本穗高於人不能成
穀其水北下注於溪名白沙水溪水又西龍髭磔水注之水上
承船船塢水有圓石三疊在塢頂其水西合天心湖湖水澄澹
多金蓮草又合香草湖山民方採前胡泥中又名爛泥湖一日
百籬坵合流經船底村北下亂峽間過西林庵爲龍磔穿泥塢
下注於溪溪水又西中塘水注之水上承三台石嶺五子石白
面石皆大圍西峯也西北穿亂石坪經中塘瓦鱗坪下注于溪
溪水又西經東門達戶官渡左右納諸小水水益大可勝舟又
西至永和市人烟盛又西行百餘里至雙江口左合小溪爲瀏
水其下流過縣以西入於湘滙于洞庭長可八九百里也

蜀源

錄西北兩源其南源自縣江口以上皆湯周山陰水以下則
浮樓山陰水去大圍遠並不錄與江亦然

蜀水西源出宜春太平關東流併左右水三十里至萬載楮樹
潭可勝舟帆東至池下北西源自金鐘山南來會又東逕大皇
山南白水二水花橋水相次歸之通爲蜀水東至官庄北源牟
村水來會水出進城鄉九龍山南北與古塘分水其谷自西而
東首朱木橋次社背次城上連爲一東南流其左谷自西而東
首家山次楊家山次上下西源次雷公板坑次英公塢次王居
洞連爲一西南流會於仙源之口折而南經清水塘下船篷峽
奇麗爲諸峽最三爪山水左來入之又南石馬漕水自王皮山
南來會是爲双江口逕牟村東南入于蜀水蜀水委蛇東北行
過縣江口與江口又東北至上高正渡江口北東源大溪水自

左來會

蜀水北東源出歐桂東鄉金盆架鳳凰山東西與黃洞分水谷口危壁百丈有小雪山連嶂瑩白東南流逕飛虎峽右合鄧公嶺竹峒水在古塘東東流收其左右渠水會於峽又東留皮峒水自左注之水出三界山天井欄石闕高峙號巖險又東陳疇二坑水右注之北轉帶苦菜洲而東左逼霍少尖右逼王皮尖納其小水四五將抵船埠潭謝峽高嶺之水右來清淵雪瀑響震一山左則黎源諸水翕集汪然成川矣各紆回穿其怪通行舳檣鳳凰洲七曲右收烟竹水至高村爲泰溪又右收岐源水絕峽東北流三十里乃得平村日羅城左會藏溪東轉南至江口入於蜀水自舡埠八九十里全逕石峽行舟資雨潦猶需人

肩若帆繹從不用也蜀水又東北逕上高高安下游入于顛滙于彭蠡自入口以上長可六百里

汨源

水經注汨水東出豫章艾縣桓山西南逕吳昌縣北與純水合水源出其縣東南純山西北流又東逕縣南又北逕故城下又右會汨水按汨水與修水北源同出艾縣以桓山爲分水桓山卽今大圍北之連雲青龍等山矣然予未到闕之其水亦滙洞庭長與瀏源等

日記

九月初七發高村西溯太溪盡其源宿鄧公嶺堂子莊用之從明日庚午寒露初九七弟八弟至

初十登金盆架山大圍山橫陳天北鳥徑約三四十里山民云
紆迴至麓九十里升降往返亦不下九十也

十一入弟以事去七弟及用之偕發鳳凰山逕黃石洞至上洪
沿飯周姓店渡小溪入西阮榭亂峰間天已暝借宿山半陶
坪村卜氏宅

十二早益登上晡乃達頂在全山偏西歷覽了髻石五子石午
飯船稍歇民舍過天心湖黃梁湖玉泉村觀寺店遺址越數岡
宿船底村毛仕彩土寮

十三由玉泉村登太皇嶂南踰扁担凹降行跨東源邈迤抵鉄
樹凹飯排埠店南登止武嶺宿三灣陳店

十四却登董家尖不盡而返午過鳳凰凹飯龍潭草寮夜轉竹

馬洞

十五過百丈漕登銅淋尖與金盆連體回望大圍游跡滅沒午
飯九龍腦搖鈴壩巫姓宅際夕返
十六回高村

九頂山錄

濡春齋 少江精舍

九頂爲本里山宗半巔間四面皆有小谷而巽隅冷水院最得正
有莊東向子孫巡山暇間肄業其中每清明奠塋訖勝衣以上合
飲於此故取春露休惕之義以名齋其上游里許莊益高勝慨然
高會以來寧神所在如將見之故額以字舉冀孫支觸目生警也
山中前後勝概厚畚魯先生留詠頗多今錄四首

九頂尖 中台峰 霏玉泉 石門泉

九頂北起揚黛山

或作陽大無正音

透迤西南而東爲吳家山祖

孫嶺泥烏嶺穀皮尖九頂尖觀鷹尖黃茅嶺楓城嶼惟穀皮九頂
觀鷹傑出九頂次居第六昔人稱太湖時七十二山其中洞庭一

山備有之此山分布九嶺而九頂一尖亦繫九摺以此通主九山
猶七十二山之統洞庭矣高村開陽羣峭中此頂最得勢從東南
溪口望之一碧靄靄如夏雲敷辦又如海風颯浪杳起晴空履其
巔孤脊若搖四山伏氣穿辰戌而踴大末大蒙兩山鋪敷百十里
外如湖石列地涵烟貯秀空遠無際繞尖九泉高出率甘美可耕
治者居其三焉按漢嘉雲南皆有九頂予未能到兄子光宇自西
川回云此山頗似大峨

昔讀范公詩雲容披九頂茲山蜀中來斜擁如負屏渺渺春天
濤娟娟修月影惜無玻璃江留照蛾眉靚

中台峰端立九頂東南其巔平厚盡攝前山之勝左右連山怪巧
森矗垣外靡然翕附真羣峰之領袖也其下爲蒼龍臺爲圭嶼瀕

於石門

山勢連尻脍槎枒力相抗中台揚冕旒拱揖蕭層嶂稍覺星辰
低微聞雷雨上高空集仙靈長嘯一神王

霏玉泉在棋盤石下流峭壁中有石突起飛瀑當其道不得落逆
捲而上隨風散走無定如舞蝶如梅之脫花平流數百尺復懸爲
簾蒼陰無路水霧上噴亦洽幽賞

巨石隘飛湍隨風噴寒玉光遠自他耀出甕寧藏積片片蝶影
亂霏霏香雪沃輸與眠雲人清談漱醪醪

石門泉其源爲潭瀑數處距門始合泉益大橫嶂天關與龜嶼
相錯內則重崖擁抗自成巷曲闕以外山形陡絕兩旁懸石空中
如龍虎牙齧將噬而未合泉潛運於巖巖潏然雷震不可知其處

澗爲小潭混波清湧可眺不可到支徑下大谷中踰楊嶼踞猿龕
仰望垣壁際天泉匄匄顛墜如搖幅帛百十步中虹光雪影極耳
目之幻谷中三石門此爲第一

雷霆殷地出仰視天日晶陰寒凜霜雪不知火雲行岌哉石門
壯水怒山欲傾光怪眩耳目真宰其冥冥

九頂山銘山如毛蠹者九矚雙開隘宇宙榮陞題

霏玉泉銘崖如剖甕立其側於何泉來晴雷殷響色秋雪

螺絲泉銘螺旋於頂絲絡於空練攤於下行人自崖輒反伊誰仰
遡者三銘並辛亥嶧峨署寄刻

庭山書屋記

祖居後左荷樹墩南麓降爲田其脊隱然包上下灣坵圍於右腋
而前爲東坵角坵又南少西爲團山非山也先世以當宅左宜植
藥林爲衛故名之南岸於低田高僅數尺貼脊東南田勢微厝

先府君因其自然闢治之構書屋五間右居四間前臨下村平甸
大溪控引以出有峰低秀回映正衝巽維高村皆土山惟院基所
據石屏右張端以近雞冠左峙怪而遙於舒眺特宜乃卽右臂啟
門包窪爲沼累壠爲垣瀏如密如異境頓開不覺聚廬之邇也勤
課子孫先後隸府縣儒學或忝科名膺歲貢焉姻親問學者亦屢
成名歲丙午歐陽貳府晴巖來過精楷法大書庭山書屋四字揭
之端凝道健若仰粹容自此草堂數椽並江山不朽矣今次先府

厚岡文集 卷之四
君遺詩數首泊賓客贈言諸子承教之作俱刊譜及厚岡詩稿以存其概附
近若書樓東園屏風石涼菴剩沙菴前人各蹟留詠所及採畧無
遺子孫賢有力者相時歷飾之儒風必有異於今茲爾

屏風石記

屏風石自金星墩右麓南降高田伏為平田左轉為玉帶案繞祖
居以東經楓坪社皆平壤無石至是拔起如屏風高廣丈餘四邊
直削自然成就從石十餘座色並焚如形家謂值祖宅水口為浮
印形少勝於多也

高邨里中有石焉拔起平曠逸焉寡儔高盈雉而廣踰丈面西
以展望之端整如巨屏然以其邇於吾友席上李氏之門也故
質稱之曰屏石云今年夏予讀書其地遍閱奇勝特愛是石而
日與席上昆季盤桓其間高村僻在邑之北其溪山合沓縱廣
殆十數里奇氣之所鍾是宜多有以吾所知者論之李氏一門
而外此石其一矣然以生之僻也貴遊之士不知問農夫漁父

過而漏之惟李氏悅之深世與居焉今更值予一見而數致其
敬若予者亦可爲此石增一知己歟予因私念吾邑絕少佳勝
乃如迤江諸石岸衆亦取而品目之以爲美景文人騷士過則
笑焉頗怪造物不以此石公都邑獨以之私李氏也雖然造物
之愛憎似與人不同人情尚竒衰喜諧媚故惟迤江諸石如牛
馬熊羆婉轉有致始合其氣類若此石直方端慤於人世正恐
不相當耳園林之羅列巾箱之取攜遇竹溪銀岩之工搜竒斲
秀則貨而狎之此石安可干耶然則造物卽奪而公之都邑人
果能好之否耶宜此石之私昵於李氏也嗟夫世俗好邪惡正
下至遊觀之事亦莫不然可慨也已

康熙甲午夏五五日縣北

張本初明德記

不與山坡隣盤空氣傲兀雲間張玉屏天闕搢象笏徑絕無鉤
梯孤標謝請謁勿矜匠石能磨礱傷峻骨

魯厚翁先生

東園記

榮陛自幼入塾屆正旦輒同思贊囑况敬
至聖位申敬訖
乃敢執業比登賢書聞官衙有
大慶賀率先弟子設位福
興院布嵩祝之私甲寅歸自雲南老病不能遠出而庭山館
尚爲諸姪假寓不得已命諸子就厚岡書屋之東園爲南廊
北拱草亭以便將事歷今三年矣禮莫隆於三本天覆地載
舍生之類尊親誼難忘子孫幸列宮墻他日未可謂具文弗
勉行之

天開有道

皇王運春紀乾隆六十年顓頊

神孫紹黃永武丁世美讓今先河山遠統九州外仙聖齊呼峻極

巔日月光華顯且復重元

盛事古誰傳 山居朔朝望夜雲陰雨食皆不見

歲惟乙卯三陽始六十年承六十年

大德千齡錫自

帝

重華後聖協於

先烏蟾交互明中外草木昭回極瀝巔滇署

王春隨拜久歸山未敢闕

呼傳乙卯上元恭紀二首

至聖尼山造中庸述聖宣肫肫仁育物浩浩德流川律襲參三

極見聞等百賢聰明睿知古刪述纂修全溥博乾同運幽深

海莫穿尊親皆血氣表則隘中邊宇宙推誠至經綸仰自然

神而知不可美必入斯甄無尚生民始大成永古綿折中遷

史定加號宋宗先揆本齊天祖歸功晉帝元懸音如何豐昵

祀曾是薄師筵別統非承統私天適蔑天洪儒迷拔擢議禮

騁機權勢位浮雲散尊崇

後聖堅大哉黃殿製兩字豈瓊傳丁巳春二日東園肅禮作示學

子論聖號不始張璁

復登更古山 摘憂餘錄

四月初二無兜子信意南渡復上亘古窮其巔之東巒坡上小脊斜引望上下高村在北烟竹南上岐源南下山天外環相距畧等計高村諸山首金盆架其幹南出大庾祖武功挈大圍而盡於武昌兩省界山也金盆架分枝北東轉爲三界嶺天井欄霍少尖憑此頂西望正最大圍叢嶠蔽天其北枝左抱爲金鈎逆以西爲九頂東派黃茅楓城中古又東爲雞冠天湖皇竺井灣止於芙蓉嶂南枝右抱爲黃皮紗帽謝山本支所出也又東爲大蕪雲芒仙壇七星止於克巢砦北枝外之皇柏壇八疊山双丫髻南枝外之湯周山並揭秀雲端其水出霍少南北合以東右收烟竹水爲高村大溪又右收岐源水曲折穿砦嶂逕羅城左會藏溪東南行入於

蜀水高材號萬載山窠然山最高者可望數百里而道遠近村推
中古婁微見浮末綻綠鱗鱗與內峯相補然偏值南位此頂寥寥
數弓乃能全寫大圍於湖南少挹低村於瑞郡送目優矣直上猶
三星故不易卽之

更古齋記

更古山北頂微窪其山偃山灣祖居南大溪外如賓見主肅然相
對中枝垂爲樟岡先塋在焉左右枝分衛於前東峯曰賓旭西峰
曰餞曠其水分導兩腋東曰樟阮西曰上坑北流合爲一繞餞曠
右轉之坡以出屬於大溪坡外田坵十餘左右距山前與村甸連
是樟岡之外戶也築屋亦幽靜村童依以授經名曰乾阮館良向
館之右沿澗以入瀑泉兩疊從樟岡來下疊直垂高尋丈上疊稍
側迤高四五丈夏秋雨餘勢盛雷聲震谷雪練相牽耳目爲之惶
惑村中平地發此竒不似他山瀑湏窮探也爲此山勝景第一館
中人饜觀之其下合上阮水溯行二百步可營竹庄癸向折而東
升過岡趾出瀑泉之上梯田稜稜夾松陰中苗不能結竦農棄之

得良農利以雜植徑折竹深泉溜間至下塘隄益陰凜魚不孳大竹櫛比出其上塘乃有日色更古齋在焉三面林嶺蔽天北望綠光中楓城嶮卓立相照奧中時有曠趣瓦屋三間以處師弟子中堂更古齋三大字安福歐陽晴巖題西厦以後山逼減少半東厦別取南向構外軒爲衛兩楹聯曰抽翠籠烟和光闕景曲阜孔雪廬書贈日徃徬臨已午幽泉如琴撲戶側出山翁居宜之其頂通爲長樓東向春秋以釋奠中額曰拱極備庶民惟星之祝焉其下兩廂及前門縮地序列庖湔圃厠底隙惟宜更古云者或曰羅城爲縣時風遞鼓聲至此然文不作鼓巨音亦別其說未然蓋對北有中古樓山此以更古應之今南麓人亦云舊古家也非好古之篤不能標此孟子云未足天下士不如誦詩讀書論世之深况求

之中古以上哉名齋之義未以加此齋鑿僻取基無布武地積於軒後架梯圍級以升洛花數本橫陳籬下名之曰牡丹稜次菊畦次茶塢次盆塘次梅蹊花罨石泉遍次方竹塢次栢松崖杪櫛坪木蘭岬最上蒙泉並坎旁山爲脰圈籬於谷尾冀斷人牛之伺谷之勝窮於此然長夏可逃暑而多飛蚊冬春晷短積冰雪賴借映於北列遠山從朝至暝爲此中寒谷之春耳出齋門左逕菜畦中折登數百步卽抵先塋春秋多霽可頻奉謁望祖居井井人行語如相聞門右平行數百步至賓暘之巔村甸下列春觀蒔夏觀穫秋觀朝霧離合尤利冬曦之和自此循垠東下卽抵長阮可營別齋向與更古同名之曰有隣左綴坪峯宜坐語名之曰函丈右聳石峰如聚獸名之曰踞攀噫患無人不患無地學館亦萃于此山

矣樟岡據高村中心更古別攬烟竹岐源有高空之曠不可無兩
谷之幽予五十以前亦罕至此購得後履行訝其水不覆蟹背茅
寮一區繚繞西僻下如茅鼠穴後乃漸事開墾初爲土屋築上下
塘以岸虛將傾前歲易以木家計日迫工食大難雖小構三年未
就緒都管又無人盜伐不禁大抵宜稍購近田合乾院所出專夫
一名四周巡邏以衛齋坐別於塘塍結廬南向取暖兼衛下塘資
學徒魚笋之用子孫宜籌之丁巳夏閏記稿中詩二首一在夫
齋前

平曠書屋記

愛而知惡憎而知善兩端之準也於人然山水胡不然記遊之籍
汗牛馬責其毫髮無憾者名勝難言之况僻壤哉舊苦大曠山巖
峴過輒掩目家人更以問舍爲鄙柔峰曠壤悉他歸年屆半百從
兄弟授先人薪土以此自聊焚斲芟植旣雨旣暘異日過之斲者
蓋張禿者纓披不惡而美轉拒爲迎試進探其奧得坪焉級而左
之再得坪焉辰向而睇後辰前呀兩抱洞若川橫嶺互相依不捨
高明游息之觀粗具於是授意山民迎東曦立把茅爲耕讀庇園
林渠沼其成以漸亦久已置之者艾逐食萬里攬山之宗過飫生
噓投老歸來譬之病後虛空所甘疏糲他不樂聞間過有力者柔
曠之墟淡如也噫山之美惡有定而無定人之愛憎益奇而益常

豈不亦以時哉或致詰曰如翁足跡半天下又多嗜竒白鹿嶽麓
石鼓予皆至之何由拳拳足跡間固舊所不滿也鄭重學徒而爲

之說吾弗解請揭此義以對嘉慶丙辰記

鶴頂岡居溪水北岸第一曲中地各颺山大灣有西大翻卽龍形
垠垠俗音良披脊之名西內翻東內翻東大翻一名雷槌垠鶴形

肩而首中垂甚端正溪外層山相衛不相侵左右出泉抵味末而
合注於溪皆巖谷西內脊稍平可治爲寮

平曠中曠居溪水西岸第二曲地各大曠裡右半山有南垠卽東

大翻分水白石灣霧露江內平高平雙了垠北鈎嶺卽右半左半
分水處書屋在高平

平曠西轉爲鶴頂岡其址南與紗帽山址隔溪相錯紗帽尖於謝

山爲北條壘峯三疊西東橫上中二疊各迤三峯北行附小峰三
如貫珠山下所不見前疊一峰直峙倚後爲西嶂左右支峰龍嵒
各自謝山九頂前來衛之雲芒天湖二山對峙如東門矣九頂之
觀履高愈壯紗帽就下始完統低易而臨高難其少遜固以此然
山之北稍降卽有田園廬舍可宮山爲卧具而九頂峻絕托宿較
遠遊跡亦稍稀焉山以南爲背大石錯列於上峰如叢莖中峰有
石飛來底平如臺而高削八稜石置其上摇摇危壁間望尤竒自
中峯分路右降有小山包梯田百十石於內莊農可十家地名尹
家嶺當關有祠林山杜鵑高丈餘紅白花艷艷墮水聲中其下合
左距水右外距水崎嶇行始名鋸阮歸溪在周宅灣上去鶴頂四
里餘前月予取蹕家嶺以入茲直躡其巔從七弟毅孫侍行微雨

憇蕉嶺莊煨朱芋療飢旋霽別七弟而下涉溪底平曠日尚高有
餘興遂登鶴頂岡其高半紗帽南望攀躋處秀峰歷歷旋自東向
其境一新蓋此岡際九頂西距窮處後山圍于澗外衆流翕而前
雲芒三峰萃起如舒蓮餘水口數峯尚可辨暝色隨來晉之追及
於山肩乃下三月二十九晦日

朝江館記

起船埠潭迄將軍石大溪穿鳳凰洲山峽凡六曲朝江埠歸第三
曲南岸望水外北山尊嚴其麓各有支峰橫延呼吸烟雲迷藏樵
牧以飾其嶽峯平疇沙岸可百步天容曠發前後莫與倫館地勝
矣後之秀有能借山水以陶冶性靈磨礱事業探尋先府君學脈
晝夜不舍日升川至豈有山中人坐壤之誚乎孔子曰仁者樂山

仁者壽履豨况之山民張翰萬始寓此與第五曲周日宜耕鑿不
知並躋九十妻甫後一旬若化若仙非同里並時之林類歎高村
以往乃無有彼汾一曲未可輕哉

路口趁墟記

期時與地以易貨北省謂之集南省謂之墟瑞州西南墟最知名者路口歲以八月之廿五數郡環而湊焉其地在上高末山之北李氏叟名煜者與予外有連壬秋之仲來唐下村邀予嘗登九頂望末山如門屏心諾之沿大溪以下度蜀水丁巳抵叟之東邊里烟火萬家無他氏相雜乃祖故孝廉凌漢國初頗有文名豪放愛客嘗匯末陰諸水爲浸於別館春漲花深盪漿蓮月好事者至今傳道之坐是家漸落比叟之身僅餘塘半畝養魚自給不能蓄妻子其嗜交猶祖風矣戊午循視墟所聚商二三萬牛馬別羣如雲如茶耕人頗資其便而游民特多時時沸擾爲縣者雖移巡司鎮之迄不能制云南望末山不遠末山於上高諸山號爲絕特其雲

峰石洞草木之芳華往往有之九峰寺踞其麓隱然可見已未道
予以往觀其陂陁之廣衍其中懷竒抱秀必非虛也陟山未半風
露不寒悵然而返寺前廢磔尙餘延祐刻字後殿塑尼了然所謂
非女非男者燈錄具載其說昔韓子倉猝過衡而雲消峰淨今予
坐卧末陰山靈顧深闕如此意者畏囂太甚不果應默禱之誠歟
姑記其始以俟續遊甲午七月晦改定

明一統志云末山東連九峰唐人云韞映迴合迥出雲末故名宋
阮閱經此有詩斜陽騎馬末山隈淡碧晴空雁字回一片愁懷似
黃葉晚風吹送九峯來 九峰山其峰有九曰雲末飛雲香爐翠
霞蒼玉芙蓉清流蛾眉天竺宋蔣之竒詩綠澗扳崖入翠霞寺僧
猶記舊鍾家芙蓉秀出天河外我欲名爲小九華 按九峯卽末

山支附之峯雲末一峯末山所由得名一統分爲二山誤矣

月同文集

卷四

墨



